

حنين

يامّا فينك

لو تجينى بس ليلة

أرمى راسى فوق كتافك

تمسحى دمعى بايديك

بحلم إنى قلبى شافك

أيوة يامّا ..لو تجينى

تحضنينى...

بس ليلة هيا ياما

محتاجالك..

أشتكيلك

أحكى همي

آه واحشنى انك تضى
جوه ف ضلوعك آهاتى
تظبطى يامًا حياتى
ده انتى يامًا
كنتى سامعانى ف سكاتى
كنتى دايمًا تفهمينى تحسى بيا
حتى لو مليون حكاية .. أحكيها لك
بتقولى لى ...
إحكي قولى المتدارية !!
لو أخبى تلمحينى
تمسكى الدمعة ف عينى
محتاجة لك
عاوزة أقولك كل حاجة
مش بقولها لحد تانى

عاوزة أشكى لك زمانى

حاسة بيّا ..؟؟

قلبي موجوع تانى يا ما

كلهم باعوا القضية

كلهم عايشين حياتهم

جوا دايرة و متدارية

كلهم فاكرينى جامدة .. أو عفية

بس أنا بردانة ياما....

والشتا هال علّيا

والليالى فيه طويلة

كل ليلة بالف ليلة

والكلام مليون أسية

والدموع صارت وسيلة

تقضى أوقاتى الغبية

حاسة بيا ..؟؟
طب تعالى ...محتاجالك
هى ليلة بس ياما
لو تجينى
هحكى فيها كل حاجة
أيوة هشكى لك أنينى
و أشكى ناس وجعونى ياما
سهروا الدمعات ف عينى
لو تجينى ..
ليلة واحدة بس ياما
ريحينى ..
أو بلاها الدنيا ديا
مدي ايدك ..واطلبى من الله
خدينى !!